



Fasnacht 2011

Alti Basler Dante

sit 1947

Drei Dääg duss - isch das e Gnuss

(Wo hi mit dr Affe-Bandi ?)

Dr Baslerzolli 's isch dr Wahn
het e neie grosse Plan.
S Affehus das isch hald alt
und fir d' Bewohner betonkalt.

Drum duet me jetzt en Tschungel baue
wo me si in dr Natur cha bschaue.
Mängs Problem het me doch gseh:
Wo sell me die Affe anegeh?

Ins Rothus kennt me si doch bringe;
denn würdi mängs viel besser glinge.
D' Pfläg kennt dr Conti iberneh.
Als Trainer kennt i dr Eymann gseh.

Schtell dir dr Conti mit Banane vor;
mit Orangsche und Nüssli vor em Tor
vom Rothus, das wär glatt zum Lache.
Dr Eymann miest e Wärgschtatt mache;

wo d' Affe mieste harmonisch sueche;
wie d' Lehrer halt und ohni Flueche,
bis si ihr Frässe hätte gfunde
nach tolle, guete PISA-Stunde.

Au nei dä Platz isch total lätz!
Bringsch d' Affe do dermit in d' Sätz.
Die sin jo jetzt scho affig gnue
und kiente dört gar nit zur Rueh.

Me suecht; het meh als ei Idee;
was mit de Affe kennti gscheh.
In d' Ferie schicke, laufe lo:
In zwei Joor sind dr wieder do.

Das got doch nit, hän dir e Knall !
Fir dr Olivier en schwere Fall.
Do findet sich zum Glick en Hort;
's isch allerdings e gheime Ort.

D Gorilla, Schimpanse und glaini Affe
duet me zur Novartis schaffe.
D Orang-Utan ich find das dr Grus
schafft me doch bigoscht gar us.

Derby hän die doch nüt verbroche !
Eh, nei uf das ka me nit bloche (e poche).
E glaubet's mir; i meins nit so!
Die mien nit zrugg nach Borneo.

Me tuet si in d' EU integriere.
Ins Schwobeland si interniere.
In Gelsenkirchen dien die huse
und mien am lengschte uswärts pfuse.

Die arme Affe dien mir laid !
zwei Joor isch's Läbe gar kei Fraid !
Doch denn vo Ascht zue Ascht duet springe
die Affebandi und duet singe:

Isch gsi e schweri Nuss,
jetzt sin mir wieder duss;
und hän jetzt Baim im Iberfluss!
Isch gsi e schweri Nuss,
jetzt sin mir wieder duss;
und hän jetzt Baim im Iberfluss!

*D Ladäärne-Uusstellig uff em Minschterblatz und
d' Waage- und Reggwisyte-Uusstellig bi dr
Kasäärne sin vom Määntig znacht bis am Mittwuch
demoorge! Deert und an de 3 Verkaufsständ (CINS)
in dr Stadt ka me n au alli Zeedel und
Schnitzelbängg, d' Blaggedde und dr Rädäbäng
kaufe.*

*Am Sunntig, 20. Märze isch d'Zeedellääsete
vo 17 – 19 h NEU im Meriansaal vom Hotel Merian/
Kaffi Spitz; dr Ytritt isch vergäbe, Getränkebuffet in
dr Pause.*

.....